

SOLENI DADE IMAKULADA KONSEISAUN

TEMA

Iha Solenidade Imakulada Konseisaun, ita simu konvite atu tetu tipu resposta nian ne'ebé ita fó ba Maromak nia dezafiu sira. Hodi propoin nia ezemplu Maria Nazaré, liturjia konvida ita atu simu, ho fuan nakloke no disponível, ba Maromak nia planu no ba mundu.

Leitura daruak garante ita katak Maromak iha projetu moris nakonu, loos no totál ba mane no fetu ida-idak, projetu ida ne'ebé hori uluk kedas nafatin iha Maromak nia planu. Projetu ne'e, apresenta tiha ona ba ema sira liuhusi Jezús Kristu, no ezije husi ita ida-idak resposta ida ne'ebé desidida, totál no lahó hanoin seluseluk.

Leitura dahuluk, hodi uza imajen mítika Adaun no Eva nian, hatudu saida mak akontese bainhira ita rejeita Maromak nia proposta sira no prefere mak dalan sira egoíзму nian, orgullu ka foti-an nian no autosufisiénsia nian... Moris dook husi Maromak inevitavelmente lori atu liu husi dalan sofrimentu nian, destruisaun nian, tristeza nian no mate nian.

Evanjellu apresenta Maria nia resposta ba Maromak nia planu. Kontráriu husi Adaun no Eva, Maria rejeita orgullu, egoíзму no autosufisiénsia no prefere halo nia moris tuir Maromak nia planu sira, ho forma totál no radikál. Husi nia "sim" totál, rezulta salvasaun no moris nakonu ba nia no ba mundu.

LEITURA I – Gen 3,9-15.20

Relatu jahwista Gn 2,4b-3,24 kona-ba orijen moris no salan nian apresenta ho imajen sugestiva sira, kolorida no forte mak katekeze ida kona-ba orjen moris nian no aat nian ne'ebé halo mundu nia oin sai aat, fahe ba parte tolu, ho situaun sira ne'ebé kontráriu ba malu.

Iha parte dahuluk (kf. Gn 2,4b-25), autór deskreve kriasaun paraízu nian no ema nian; nia apresenta Maromak nia kriasaun nu'udar espasu ideal ksolok nian, iha-ne'ebé buat hotu di'ak no ema moris iha komuñaun totál ho kriador no kriatura seluk.

Iha parte daruak (kf. Gn 3,1-7), autór deskreve mane no fetu nia salan; hatudu opsaun sira ne'ebé naksalak hodi hatama iha komuñaun ema nian ho Maromak no kriasaun hotu, fatór sira dezekilíbriu no mate nian.

Parte datoluk (kf. Gn 3,8-24), autór apresenta mane no fetu ne'ebé Maromak konfronta ho rezultadu sira-nia opsaun sira-nian.

Iha katekista jahwista nia perspetiva, Maromak kria ema ba ksolok... Nune'e, nia husu, tanba sá ohin lora ita hatene egoíзму, injustisa, violénsia ne'ebé halo mundu nia oin sai aat? Resposta iha istória umana: ema ne'ebé Maromak hakiak livre no haksolok, hili sala no hatama iha kriasaun di'ak Maromak nian dinamizmu sira sofrimentu no mate nian.

MENSAJEN

Ita-nia leitura hahú ho Maromak nia "investigasaun"... Molok Maromak akuza, nia investiga, deskobre no estabese faktu sira.

Maromak nia pergunta dahuluk ba mane: "ó iha-ne'ebé?" Mane nia resposta mak konfisaun ida ona ba ninia culpabilidade: "Ha'u rona ita-nia ain hakat sira iha jardín no, tanba isin tanan, ha'u ta'uk no hakmumik an" (vers. 9-10). Moe no ta'uk mak sinál perturbasaun interiór ida, rutura ho situaun anteriór inosénsia nian, armonia nian, hakmatek no dame nian. Oinsá mak ema to'o ba situaun ida-ne'e? Evidentemente, hodi dezobedese ba Maromak no la'o tuir dalan kontráriu sira husi ida-ne'ebé Maromak propoin ba nia. Ema nia resposta hatudu sai ninia segredu no ninia culpa.

Hafoin, pergunta daruak Maromak nian mak retórica ida: "Toh ó han ai-fuan husi ai-hun ne'ebé ha'u bandu atu han?" (vers. 11). Ai-hun ne'e "ai-hun koñesimentu kona-ba di'ak no aat", signífika orgullu, autosufisiénsia, tau sees Maromak nia proposta sira, hakarak deside mesak saida mak di'ak no saida mak aat, tau an rasik iha Maromak nia fatin, hakarak autonomia totál hasoru kriador. Ema nia situasaun, ne'ebé la hakmatek no iha rutura mak resposta momoos ida ona ba Maromak nia pergunta... Ema "han husi ai-hun ne'ebé bandu", katak, nia hili dalan orgullu no autosufisiénisa nian. Tanba ne'e nia moe no ta'uk.

Binhira defende an, mane akuza fetu no, tempu hanesan, akuza Maromak ba ninia situasaun: "fetu ne'ebé ita fó nu'udar maluk fó ai-fuan husi ai-hun no ha'u han" (vers. 12). Adaun reprezenta umanidade ne'ebé mout iha egoizmu no autosufisiénsia, haluha tiha Maromak nia don sira no haree Maromak nu'udar funu-balu; husi parte seluk, Adaun nia resposta hatudu umanidade ida ne'ebé harahun unidade no hela iha kobardia, iha falta solidariedade nian, iha ódiu.

Tuirmai "fetu nia defeza": "samea bosok ha'u no ha'u han" (vers. 13). Entre povu kananeu sira, samea liga ho ritu sira fertilidade no fekundidade nian. Israelita sira iha atrasaun ba kultu sira-ne'e, no dalabarak, sira abandona Jahwéh atu tuir rituál relijiozu kananeu sira-nian no nune'e, asegura fekundidade to'os no balada sira-nian. Iha tempu autór jahwista hakerek, samea mak "ai-fuan bandu nian", ne'ebé bateur fiar-na'in sira no lori sira atu abandona Maromak nia Lei. Iha kontestu ne'e "samea" mak símbolu literáriu ba buat hotu ne'ebé hadook israelita sira husi Jahwéh. "Fetu" nia resposta konfirma buat hotu ne'ebé dehan ona: loos duni katak, umanidade ne'ebé Maromak kria husik tiha Maromak, la tuir ninia proposta sira no la'o tuir dalan seluk, katak egoizmu no autosufisiénsia nian.

La presiza tan ona pergunta seluk. Haree momoos ona sá loos umanidade nia kulpa. Sá tan mak Maromak tenke halo? Kondena buat ne'ebé falsu no bosok nian iha kultu sira-ne'e no iha tentasaun sira ne'ebé bateur israelita sira no halo sira sai husi dinámika Aliansa nian no ukun-fuan sira-nian (vers. 14-15). Ita-nia katekista jahwista hatene katak samea mak balada ne'ebé pasa nia moris han rai-rahun, Autór uza ida-ne'e atu haktuir kondensasaun radikál ba buat hotu ne'ebé lori ema atu hadook an husi Maromak nia dalan sira no la'o tuir dalan egoizmu no autosufisiénsia nian.

Saida mak signifikadu funu-balu no funu entre "fetu nia "bei-oan sira" no samea nia "bei-oan sira"? Karik, autór jahwista hakarak de'it fó esplikasaun etiolójika ba faktu katak samea hamosu ta'uk no hakribin husi manu sira no husi ema hotu ne'ebé buka "hanehan nia ulun"; maibé interpretasaun judaika no kristán haree iha liafuan sira-ne'e profesia mesiánika ida: Maromak haklaken katak "fetu nia oan-mane" ida (Mesias) sei halakon konsekuénsia sira salan nian no sei hatama umanidade iha dinámika grasa nian.

Atensaun: autór sagradu la ko'alia kona-ba salan ne'ebé mane no fetu dahuluk husi inísiu umanidade nian halo; maibé nia ko'alia kona-ba salan ne'ebé ema hotu, fetu no mane husi tempu hotu halo... Nia hakarak de'it hanorin katak buat aat hotu nia abut mai husi ema nia hadook an eh tau sees Maromak no harii mundu ida ho kritériu sira egoizmu no autosufisiénsia nian.

LEITURA II - Ef 1, 3-6.11-12

Sidade Éfeso, kapitál Provínsia romana Ázia nian, situa iha kosta osidental Ázia Menór nian. Ninia portu importante no ninia populasau ne'ebé boot halo nia sai sidade ne'ebé buras. Paulu liu husi Éfeso iha ninia viajen misionária daruak (kf. Apóst 18,19-21) no, durante ninia viajen misionária datoluk, nia halo Éfeso sai kuartél-jenerál, atu husi ne'ebá evanjeliza zona osidental tomak Ázia Menór nian.

Surat ba Eféziu sira mak ezemplár ida "surat sirkulár" nian, haruka ba Kreda oioiin Ázia Menór nian, iha altura ne'ebé Paulo iha dadur laran (Roma kark?). Ninia portador mak Tikiku. Ita iha tinan sira entre 58/60.

Ema balun haree iha surat ne'e espésie ida sínteze teolojia paulina nian, iha altura ne'ebé apóstolu ne'e nia misaun iha loro-sa'e remata. Tema importante liu Surat ba Eféziu sira mak buat ne'ebé autór hanaran "mistériu": Maromak nia projetu salvasaun nian, ne'ebé horiuluk kedas define, revela no kontretiza tomak iha Jezús, komunika ba apóstolu sira no, iha "Tempu Ikus sira", sai presente iha mundu liuhusi Kreda.

Testu ne'ebé ohin propoin mai ita, mosu iha surat nia inísiu. Nia halo parte ba knananuk litúrjiku ida ne'ebé sirkula iha comunidade sarani sira molok Paulo hatama iha surat. Knananuk ne'e agradese ba Aman nia hahalok sira (kf. Ef 1,3-6), Oan nian (kf. Ef 1,7-12) no Espíritu Santu nian (kf. Ef 1,13-14) tanba oferese salvasaun ba ema sira.

MENSAJEN

Agradesimentu dirije ba Maromak, basá Nia mak hun loloos grasa hotu ne'ebé haraik ba ema. Grasa sira-ne'e atinje ema sira liuhusi Oan-Mane, Jezús Kristu. Aman nia hahalok mak, husi uluk kedas hili ita atu "sai santu no sala-laek". Liafuan "santu" indika situasaun haketak husi mundu no konsagra ba Maromak, ba servisu Maromak nian; liafuan "sala-laek" uza ba vítima sakrifísiu nian ba Maromak, ne'ebé tenke sala-laek, laho defeitu... Ne'e duni, signifika santidade, katak konsagrasaun ba Maromak ne'ebé loos no radikál. Aleinde hili ita, Aman mós predestina ita "atu sai nia oan hakiak sira". Lihusi Kristu, Aman oferese mai ita nia moris no integra ita iha ninia família nu'udar oan sira. Maromak nia asaun ne'e ba ninia glória no louvór. "Eleisaun" no "adosaun nu'udar oan sira" tanba Maromak nia domin boot ba ema sira, domin gratuitu, inkondisionál no radikál.

No sá loos Jezús Kristu, Oan-Mane, nia papél iha prosesu ida-ne'e? Lihusi Kristu nia sakrifísiu iha Krús, Maromak hasuli grasa mai ita, halo ita sai ema foun no diferente, ho kbiit atu moris iha domin. Maromak manifesta mai ita ninia projetu salvasaun ne'ebé knananuk ne'e hanaran "mistériu", no konsiste iha lori ita ba identifikasaun loloos ho Jezús, iha ninia kapasidade laho limite atu hadomi no haraik moris mai ita, ba unidade no armonia totál ho Jezús. Hodi identifika an ho Kristu no hanorin ita moris iha domin totál no radikál, Maromak rekonsilia ita ho Nia An rasik, ho ema seluk no ho natureza rasik. Husi Kristu nia asaun redentora moris mai Ema Foun, ho kapasidade ba tipu foun relasionamentu nian ho Maromak, ho ema seluk no ho kriasaun tomak, la'ós ona marka ho egoizmu, ho orgullu, ho autosufisiénsia, maibé marka ho domin no don moris nian.

EVANJELLU - Lc 1, 26-38

Sena Evanjellu nian situa iha aldeia ida Galileia nian, hanaran Nazaré. Galileia, rejiaun iha Norte Palestina nian, besik Bee-lihun eh Tasi Tiberíades nian, mak rai ida ne'ebé judeu sira konsidera dook no rai estrañu seluk ida, ne'ebé iha kontaktu permanente ho populusaun jentiu sira no pratika relijiaun kahur-malu nian, ho influénsia husi kostume no tradisaun jentiu sira-nian. Nune'e mak mestre judeu sira Jerusalém nian hanoin katak "husi Galileia labele mai buat di'ak ruma". Kona-ba Nazaré, ne'e mak aldeia kiak ida no ignorada, nunka temi iha istória relijioza judaika no, tanba ne'e, tuir mentalidade judaika, sira ne'e dook husi Maromak nia dalan no salvasaun.

Maria, joven Nazaré nian mak sentru ba epizódiu ida-ne'e, "feto-raan ida ne'ebé hakotu tiha ona ba mane ida naran José". Kazamentu ebraiku konsidera kompromisu kazamentu nian iha etapa rua: dahuluk, mak noivu/a sira promete ba malu; etapa daruak mak mai kompromisu definitivu ho serimónia sira... Entre etapa rua ne'e, iha tempu maizumenus naruk, iha-ne'ebé parte na'in rua ne'e bele husik malu, maski iha penalidade ruma. Iha etapa dahuluk noivu sira la moris hamutuk; maibé kompromisu ne'ebé sira na'in rua asume iha ona karákteer estável, no se karik mosu oan ida, oan ne'e konsderadu nu'udar oan lejítimu sira na'in rua nian. Lei Moisés nian konsidera infidelidade husi ida-ne'ebé hakotu ona lia hanesan ho infidelidade kaben-na'in nian (kf. Dt 22,23-27)... No uniaun entre na'in rua ne'ebé "promete ba malu" bele sobu de'it ho fórmula jurídika divórsiu nian. José no Maria iha situasaun "promete ba malu nian", maski seidauk selebra kazamentu, maibé sira selebra ona "promesa ba malu".

MENSAJEN

Depoizde apresenta "ambiente" nian, Lucas apresenta diálogu ente Maria no anju.

Konversa hahú ho anju nia saudasaun. Iha anju nia ibun tau liafuan no espresaun sira ho resonánsia vétero-testamentária (Testamentu Tuan), liga ba kontestu sira eleisaun, vokasaun no misaun nian. Nune'e, liafuan "ave" (iha lia-gregu, "kaire") ne'ebé anju uza atu dirije ba Maria la'ós de'it saudasaun: ne'e mak eko anúnsiu sira salvasaun nian ba "Siaun nia oan-feto", figura kbiit-laek no delikada ne'ebé personifika Povu Israel nian, no iha ninia frakeza apresenta no reprezenta salvasaun ne'ebé Maromak oferese no Israel tenke fó sasin iha povu seluk nia oin (kf. 2 Re 19,21-28; Is 1,8;12,6; Jer 4,31; Sof 3,14-17). Espresaun "nakonu ho grasa" signifika katak Maria mak objetu predileksaun no domin Maromak nian. Espresaun seluk "Na'i ho ita" mak espresaun ida mosu beibeik liga ba relatu sira vokasaun nian iha Testamentu Tuan (kf. Ex 3,12 – Moisés nia vokasaun; Jz 6,12 – Gedeão nia vokasaun; Jer 1,8.19 – Jeremias nia vokasaun) no serve atu asegura ba ida-ne'ebé simu bolun, Maromak nia assisténsia iha misaun ne'ebé husu ba nia. Ne'e duni, ita iha "relatu vokasaun" ida nia oin, vokasaun Maria nian: anju nia vizita atu apresenta ba fetoraan Nazaré nian Maromak nia proposta ida. Proposta ne'e ezije husi Maria resposta ida.

Sá loos mak papél ne'ebé propoin ba Maria iha Maromak nia projetu?

Maromak propoin ba Maria atu aseita sai inan ba "oan-mane" espesiál ida... Husi "oan-mane" ne'e, nu'udar haktuir ba nia, uluknanai sei hanaran "Jezús". Naran ne'e signifika "Maromak salva", Aleinde ne'e, "oan-mane" ne'e anju apresenta nu'udar "Maromak Leten-Aas Bá [Altíssimo] nia Oan-Mane", ne'ebé sei simu nia "aman David nia tronu" nu'udar liamn-rohan, no nia ukun "sei rohan-laek". Anju nia liafuan sira lori ita ba livru '2 Sm 7' no promesa ne'ebé Maromak halo ba liurai David liuhusi profeta Nathan nia liafuan sira. "Oan-Mane" ne'e nia deskrisaun uza liafuan sira ne'ebé teolojia Israel uza atu deskreve "mesias" ne'ebé Israel hein, libertadór ne'ebé Maromak haruka ba nia Povu atu oferese moris no salvasaun definitiva ba nia.

Oinsá mak Maria hatán ba Maromak nia projetu?

Maria nia resposta hahú ho objesaun ida... Objesaun nafatin halo parte iha relatu sira vokasaun nian iha Testamentu Tuan (kf. Ex 3,11; 6,30; Is 6,5; Jer 1,6). Ne'e mak reasaun naturál ba "bolun" ida, tan hakfodak ho perspetiva kompromisu nian ne'ebé boot liu ema; maibé, liuliu, ida-ne'e mak forma ida atu hatudu Maromak nia grandeza no podér ne'ebé, maski ema sira ne'ebé simu bolun mak ema fraku no ho limitasaun, Maromak halo sira sai instrumentu ninia salvasaun nian iha ema sira leet no iha mundu.

Hasoru "objesaun" ne'e, anju garante ba Maria katak Espíritu Santu sei tun ba nia no sei hamahan nia ho nia lalatak. Espíritu ida-ne'e duni mak Maromak haruka ba juiz sira (Oteniel - kf. Jz 3,10; Gedeão - kf. Jz 6,34; Jekté - kf. Jz 11,29; Sansão - kf. Jz 14,6), ba liurai sira (Saul - kf. 1 Sm 11,6; David - kf. 1 Sm 16,13), ba profeta sira (haree profeta fetoraan Maria, Aaraun nia feton - kf. Ex 15,20; katuas sira Israel nian - kf. Nm 11,25-26; Ezequiel - kf. Ez 2,1; 3,12; Trito-Isaías - kf. Is 61,1), atu sira bele sai prezensa efikás Maromak nia salvasaun nian iha mundu. "Lalatak" ka "kalohan" lori mós ita ba "koluna kalohan nian" (kf. Ex 13,21) ne'ebé akompaña Maromak nia Povu ne'ebé la'o iha rai-fuik maran, hodi hatudu dalan ba Rai Prometida liberdade no moris foun nian. Kestaun mak ne'e: maski ho frajilidade ne'ebé Maria iha, Maromak, liuhusi nia, sei sai presente iha mundu atu oferese salvasaun ba ema hotu.

Relatu remata ho resposta finál Maria nian: "ha'u, Na'i nia atan mak ne'e; halo iha ha'u tuir ita liafuan bá". Afirma an nu'udar "atan" signifika, liufali haraik-an, rekoñese an nu'udar eleitu Maromak nian, ho buat hotu ne'ebé implika, basá, iha Testamentu Tuan, sai "Na'i nia atan" mak título ida glória nian, rezerva ba ema sira ne'ebé Maromak hili ba ninia servisu no Nia haruka ba mundu ho misaun ida (título mosu, porezemplu, iha Deutero-Isaías - kf. Is 42,1; 49,3; 50,10; 52,13; 53,2.11 – iha referénsia ba figura enigmátika "Jahwéh nia atan"). Ne'e duni, Maria rekoñese katak Maromak hili nia, aseita ho disponibilidade hilin eh eleisaun ne'e no manifesta ninia dispozisaun atu kumpre, ho fidelidade, Maromak nia projetu.